

16 DEC 1999

DR MAHATHIR SERAH JALUR GEMILANG KEPADA PASUKAN PAYUNG TERJUN MALAYSIA

PUTRA JAYA, 16 Dis (Bernama) -- Perdana Menteri Datuk Seri Dr Mahathir Mohamad hari ini menyerahkan bendera Malaysia kepada pasukan payung terjun yang akan membuat penerjunan dari kapal terbang pada ketinggian 10,000 kaki di Kutub Selatan.

Jalur Gemilang itu diserahkan kepada pasukan lapan anggota di Pejabat Perdana Menteri di sini pada satu upacara ringkas yang disusuli dengan ikrar oleh anggota pasukan untuk mengharumkan nama negara.

Seorang jurucakap berkata berkata Malaysia ialah satu-satunya negara di Asia yang menyertai acara penerjunan di paras tinggi atau dikenali sebagai "Millennium Jump 2000 -- Malaysian Time Capsule Mission For Mankind."

Beliau berkata penerjunan pada 31 Dis itu yang membabitkan sembilan negara ialah sebahagian daripada Ekspedisi Millennium Expedition yang juga sebahagian daripada Ekspedisi Antartik Rusia ke-45, ekspidisi saintifik di kawasan Antartik.

Antara lapan ahli payung terjun itu ialah seorang pegawai tentera bersara berumur 60 tahun Abdul Shukor Nasarudin dan seorang surirumah Nordziah Mohd Nor, 41 tahun.

Penerjunan Millennium itu ialah anjuran bersama Fikiran Syndicate dan Q-Training dengan kerjasama Kementerian Belia dan Sukan.

-- BERNAMA

GM FAZ